

55* *etiam* molte botege vieneno esser megliorate per la dita fabricha, siano per diti Savii visto et judicato el mioramento come a le sue consientie parerà da esser posto in la Signoria nostra ditto meglioramento, et el *simel* ordine se servi di le volte: quelli veramente che hanno comprato over aute botege libere o *cum* alcuna condition da la Signoria nostra, li siano date libere o con la condition le hanno, come è justo e conveniente.

Debano ditti Savii mandar ad execution tutte le deliberation fate per el Consejo di 47 savii in tutto e per tutto, non posendo quelle alterar in parte alcuna, ma *ad anguem* exeguir, sotto pena de ducati 500 per cadauno. *Verum*, se i ditti fusseno in *aliquo* discrepanti, debano venir con le opinion sue a questo Consejo.

Et perchè l' accade molte differentie circha le fabriche nei lochi brusati ne l'isola de Rialto, ditti Savii siano zudesi et de le sententie le appellation se devolvi a li XX Savii sopra le vendede, con tutti li modi et condition dei Sette savii sui precessori.

Al nodaro veramente, havendosi afaticà tutto questo anno passato senza premio alcuno, i ditti Savii habino libertà di proveder et deputar quel premio li parerà conveniente per sua fatica, aziò l'habi causa di continuar a far il debito suo.

† De parte	148
De non	15
Non sincere	2

56 Da poi disnar, fo Pregadi, per tuor la zonta a far i Savii.

Di campo, fo letere dil capitano zeneral, di ozi. La risposta di quelle li fo scritto per il Senato, zercha mandar 300 cavali lizieri verso Lombardia. Prima: non lauda quella cossa perchè inciteremo sguizari a venir zoso; poi tolendo, non si potrà mantener, perchè havemo tre campi, uno in Friul, l'altro qui, il terzo in Lombardia: meglio saria far un solo campo et lassar fornita Crema di fanti; et altre particolarità. Spagnoli sono tutti sul Polesene e todeschi a Lignago, et sier Prospero, ha fato far uno ponte a Lodi sopra Adda.

Fu posto, per i Consieri, Cai e Savii, una parte di suspender il debito di sier Andrea da cha' da Pexaro qu. sier Hironimo, ch'è zercha ducati . . . per do anni, e non fu presa.

Fu posto, per li diti, suspender il debito di sier Francesco da Leze qu. sier Alvixe per do anni, l'ha con la Signoria nostra, atento l'ha perso a Ravenna

tutta la sua facultà tolta per papa Julio in questa presente guerra. Non fu presa.

Fu posto per li diti, suspender per do anni *etiam* il debito di sier Andrea Arimondo qu. sier Simon, qual ha auto gran danni sul Feltrin e a Treviso etc. Non fu presa. 56 di no, 150 de si.

Fu tolto il scurtinio di la zonta al Consejo di Pregadi, nominati numero 186. Reduto il Consejo di X nuovo, numero 8, manchava sier Bortolamio Contarini è a Crema et sier Luca Trun è a Padoa. Feno li Capi di X, di Octubrio, sier Francesco Falier, sier Pollo Capello el cavalier, et sier Lucha Trun.

Fato scurtinio di tre Savii dil Consejo ordinarii, in luogo di sier Lunardo Mozenigo, sier Francesco Foscari el cavalier, sier Luca Trun che compieno, et tolli numero rimaseno questi:

Sier Tomà Mozenigo procurator, sier Cristofal Moro et sier Alvise da Molin, 102 et 100 di no; soto, sier Francesco Bragadin, sier Antonio Trun, sier Domenego Trivixan el cavalier procurator, sier Zorzi Corner el cavalier procurator, sier Polo Capelo el cavalier, sier Zacaria Dolfin.

El resto senza titolo di Savii dil Consejo.

Item, do Savii di terra ferma, in luogo di sier Gasparo Malipiero e sier Marco Minio che compieno, sier Vetur Foscari, sier Bortolomio da Mosto stati altre fiate, nè altri con titolo fono tolli; soto, ultimo balotado, sier Marin Sanudo *el grandò* qu. sier Francesco, 100 et 108 di no, el qual fo ultimo balotado.

Et licentiatò il Pregadi, restò Consejo di X con la zonta.

In questo Pregadi, fu posto, per i Consieri, Cai di XL et Savii, che li Provedadori sora il cotimo di Alexandria e di Damasco posano ancora venir in Pregadi senza meter balota fin a San Michiel che vien. 99 di no, 104 de si, e fo presa.

A di 30 Septembrio, sabato, reduto el Consejo 56* per far la prouva de li electi eri di la zonta al Consejo di Pregadi numero di qual niun fo debitor, che mai intravene questo. E nota: 4 soliti a farsi tuor non si feno nominar, e da loro medemi si privono dil Senato: sier Vincivera Dandolo fo Governador di l'intrade, di anni. . . per esser orbo venuto nè vol ussir più di caxa, sier Antonio Loredan el cavalier, fo savio dil Consejo amalato in caxa zà più di uno anno e mezo et non ense fuor di caxa, sier Vicenzo Grimani, è di la zonta, di sier Antonio procurator, qual non vol più nullà, è di anni 50, ma è dato a cosse spiritual, fa la sua vita a la Caritae. Introno li soliti e eazete *solum*, solito a intrar, sier Ve-